

152 2006TP
6

妣陳氏無出

繼妣王氏生於清雍正二年甲辰十月十


三日辰時卒於清乾隆四十六年辛丑

八月初三日辰時壽五十八歲



第十四世

濟柔公諱秉教齊字派生於清乾隆十三年戊辰十一月二十三日未時生一子維煌卒於清嘉慶十年乙丑九月二十九日辰時壽五十八歲墓在保雲障坐壬向丙



妣徐氏生於清乾隆十一年丙寅三月初

八日午時卒於清乾隆四十年乙未正

月初九日酉時年三十歲

繼妣邵氏生於清乾隆二十二年丁丑十

一月十六日酉時卒於清乾隆四十五

年庚子二月二十三日丑時年二十四



歲無出



第十五世

維煌公諱健聖字派生於清乾隆三十二年丁亥七月初三日子時生二子長晉楚次晉玉卒於清嘉慶十三年戊辰六月初五日午時年四十二歲墓在保雲障坐壬向丙



妣洪氏生於清乾隆三十五年庚寅十一

月十一日午時卒於清乾隆五十六年

辛亥五月二十四日申時年二十二歲

無出

繼妣費氏生於清乾隆三十七年壬辰八

月二十日午時卒於清道光十三年癸



巳四月二十五日壽六十二歲





第十八世明行慶桂君配葛宜人



妣葛宜人洋墅財神殿跟人生於清光緒

七年辛巳十月十五日辰時

庶妣張氏生於清光緒二十七年十一月

十六日午時



繩武記

沈氏慈谿望族有輔卿君者為尚倫
公之文孫敦書公之次子也年甫五
歲而敦書公捐館又二年而尚倫公
亦棄養家本寒素賴母氏徐太君撫
養成立太君勁節貞操持家勤儉義



方垂訓有孟母風嘗告君曰昔咸豐
辛酉髮逆竄慈我沈氏受禍尤烈據
形家言以本族宗祠右首屋宇過高
不利於族宜改造面東則吉爾祖在
日曾擬改作有志未逮爾能成先人
之志乎君誌之不忘厥後君治計然



書於滬上家業隆隆日起乃與合族
會議易向改建宗祠咸贊成之於是
鳩工庀材閱年餘工竣丹青土木煥
然一新需費四萬餘金同族所捐者
不足四千金君獨任三萬餘千金慨
然無德色蓋遵乃祖之遺意也詩曰



繩其祖武若其有焉落成之日族人
請余一言記其績爰撮其崖略榜之
額俾後之人知所矜式云

民國十年歲在辛酉孟冬月

同邑陳康瑞謹撰



沈輔卿先生五十壽序

昔太史遷作貨殖傳言白圭善治生
以智仁勇強為其持術之本天下言
治生者祖白圭復歷引當世賢人所
以富者使後世得以觀擇本富為上
末富次之姦富最下無巖處竒士之



行而長貧賤好語仁義亦足羞也窺
史公言外之意豈不以世儒高談賤
薄商賈有慨乎言之耶古聖人開胚
渾立邦極即定日中為市之制以通
天下之財其時海外大九州皆通於
中國所謂致天下民聚天下財者未



耜之利斷不足以眩遠人商賈之利
亦不必限於內國黃軒繼作逮於姬
周疆域既定農桑始重然以周禮考
之質劑掌於官度量純制掌於官貨
賄璽節掌於官猶夫古聖人重商遺
制洎重本抑末之說盛而商賈之能



卓然有所樹立者遂尠勝清中葉泰
西諸邦交乎中夏朝宁搢紳率講求
商務而士之負異才蘊竒智者亦競
自効於商場今江海閒大商擁資萬
億者相望也然求其居心行事如白
圭所言者十不得一二商之道日重



而商之人日輕孰能挽此頽敝樹之
風聲者乎則輔卿先生其人已丙寅
四月為先生五十攬揆之辰賢子雲
鵬謀之親朋雅故將鏗金絲饌肥鮮
以樂之而先生堅不許命移金助四
方灾振雲鵬不敢違更謀之親朋雅



故求所以永先生之令譽者僉曰古
哲有言惟壽有三有王澤之壽有聲
聞之壽有行仁之壽改代以來王澤
雖下逮而不尊惟此聲聞之壽行仁
之壽終不可磨滅雖然聲聞之壽非
行仁以承之聲聞著而仍晦也行仁



之壽非聲聞以張之泯默亦未足以
勸世也以先生平居志存兼濟力行
不勸乃者輟笙簧酒食之費為窮黎
饘粥地此尤行仁之大者烏可以不
紀於是雲鵬介沈君伯威乞予贈言
予惟先生家浙之慈谿慈谿之為縣



枕高原而面曠楚九峯峙其東兩江
流其北山水清淑鍾毓秀靈以予友
朋中慈谿之富而賢者得數人焉如
先生者豈徒尋常貨殖人哉蓋抱智
仁勇強而身試之者也跡其守約居
沖猶是馬少游乘下澤車騎款段馬



稱鄉里善人意概夫惟少游拘拘雌
節而不知所以恢之視先生所為個
乎遠矣自來著述家胥以壽文為不
合古法予謂古之君子愛敬其人則
作為詩歌以寓永錫難老之祝即壽
文之權輿晚近風氣虛浮文體卑下



以瓌瑋連犴之辭飾凡猥傖俗之態
比物荃蓀連類龍鸞麗則麗矣將何
以信今而傳後與者受者宜為清議
所譏若予之敬先生以其仁也質人
不媚可得而陳先生家世耕讀潛德
弗曜粵寇之亂家道中落五歲而孤



育於大父尚倫公兄弟二人先生居
次垂髫時恭謹有禮如成人分甘之
賜推豐受嗇甚得尚倫公歡謂必昌
吾宗九歲而尚倫公謝賓客貧甚依
壽母徐太君以紡綫度日稍長能讀
書而兄又卒知佔畢不足自存喟然



曰瓶之罄矣惟壘之恥吾母缺然無
甘旨之奉日月逝矣歲不吾與雖微
毛生奉檄之望敢忘仲由負米之義
哉決棄舉子業就時於滬器幹天授
綜理微密鼠尾之帳畸零之錢千緒
萬端罔有遺混年才弱冠候時轉物



雖老於權會者媿弗如居停主人倚
如左右手營運所入纖忽不私未幾
與其姊夫蔭齋周先生釀金設肆經
營市舶方物周先生悉以事柄委之
滬為萬商之淵水浮陸行鬻良雜苦
交貿相競巧算所不能算而先生三



竒六耦瞭如指紋長商大賈靡不驚
歎薪糈羨餘悉奉母嫂既娶葛夫人
命侍嫂氏徐鄉居而迎徐太君居滬
便定省徐太君盛年子處有無黽勉
取給十指糟糠在咽涕淚在襟極人
生艱苦之遇至是始得開顏一笑焉



嫂氏徐苦節能善事其姑先生敬之
如母歲時饋遺錢帛俾無匱乏周先
生俄遘疾不起瀕危以諸子託先生
曰以教以養推之挽之惟吾子是望
先生泣而諾視諸甥如已出為之料
簡喪葬經紀財貨操贏制餘不數年



而周氏產十倍於昔諸甥亦蘄然露
頭角先生以女歸二四二甥舊姻新
姪歡好彌敦端居情話輒為述貧時
艱苦之狀乃翁創業之難若輩守成
之不易曾無隻辭自伐功能此尤常
情所難徐太君年七十餘忽染利僊



頓幾不支先生晝夜扶將中裙廁牖
躬自拭滌徵醫進藥焚香露禱精誠
所格二豎為之退舍曾不逾月安健
如常先生感天之庥益篤於事親勤
於收族既以四萬金重建宗祠置祀
田族人為作繩武記修宗譜立義學



凡為一本計者甚周戚鄙以緩急稱
貸者必立應之無難色其他施櫛贈
藥捨衣散粟歲糜數千金以為常自
奉至儉布衣蔬食等於儒素所好惟
法書名畫尤重名賢有氣節者尺縑
寸楮兼金毋怯與人交際礫落炳煥



寬和而不緣谿盜而不苛長郎雲鵬
精幹有父風次郎雲鴻誦讀倍常兒
致樊重君子之富有張霸饒為之意
孫男四人長已就傅犀玉豐美門祚
方興徐太君年八十有二矣含飴弄
孫神明強固男錢女布米鹽靡密悉



稟規畫處理秩如先生將車奉杖雖
艾猶孺親知詫為神仙都市傳為佳
話夫造物者不輕以福澤與人先生
猶是人耳何以致之純孝與積善致
之也親在不言老太君之壽無疆而
先生之年俱進即茲辭祝移振之舉



契真宰而庇羣生功德彌宏眉壽彌
永嗣君恭鞫鞠臚留以待期頤之日
可也親舊躋堂奉筭退而樂成人之
美可也世之富而賢者其盍取法於
此乎 歲在柔兆攝提格余月

愚弟費樹蔚拜撰



沈先生輔卿五十壽序

壽序者何敘其壽也何言乎敘其壽
以其與年俱進之懿行可敘也然則
敘其行耳壽又何敘哉雖然行可敘
即壽可敘也行可尊即壽可敬也敬
其壽尊其行可不敘乎敘何人輔卿



沈先生先生慈谿人天性仁孝家世
耕讀至先生時已式微又五歲而孤
七歲失大父十二歲復喪兄僅依母
徐太君嫂徐節孝針黹紡織為生活
然能順承母意事嫂敬年十四從其
姊之夫周蔭齋先生之滬上學賈於



增泰洋布號勤苦出同儕為主者所
倚月有得悉奉母歲甲辰始與周先
生蔭齋合營仁德洋布號信義卓著
旋任英商祥泰洋行華經理又任上
海振華堂上海洋布公會等董事家
業日興儉猶昔事無大小悉稟承母



旨初先生之大父尚倫公以品學優
長長沈族者二十年人皆尊曰太公
故有宗祠為洪楊亂摧毀憾未能改
建至是太君詔先生曰此汝祖志也
毋先田宅乃悉力卜築罄四萬金又
創立義務學校以教族中子弟之失



學者又聘名人修輯宗譜凡二十世
殆一千載期而壽棗及周親族施衣
藥建橋治道毋不黽勉至如上海四
明公所上海華洋義賑會等處均捐
有巨款社會公益歲有樂輸不可勝
紀皆承母意也蔭齋周先生將沒託



其貌諸孤先生撫且教兼理其業以
二女妻其二子焉歲丙寅四月為先
生五十揆辰親舊將為嵩祝先生辭
之曰飢者多矣嘉惠請移諸灾賑先
生之仁心靡已也先生之母徐太君
年八十二神明強固迎養於滬時承



色笑事嫂如事兄早娶於葛以賢淑
著有丈夫子二長雲鵬精幹遠識鑒
者知為偉器次雲鴻亦恂恂誠篤並
有男女孫數人先生既淡泊無所好
而於古之名賢有道德節概者之手
澤每致之展玩以寄志吾聞之有德



者必壽則先生之年將由耄耋而期
頤而登上壽先生之孝行仁心可以
厲俗可以訓後繼今而進者將書不
絕書將於邑乘書之將於國史書之
更毋煩鯁生詹詹之言矣

婁東郁公澤拜撰



沈君生壙記


君名慶桂字輔卿慈谿沈氏世居東
鄙池頭村祖尚倫父敦書母徐生君
兄弟二人君其次也君五齡失怙受
教祖父溫溫有成人風愛憐之彌篤
常挾抱誇衎賓從道是兒不凡也七



歲喪祖十二歲又喪其兄母與寡嫂
徐節孝交換之每夜篝一燈三人圍
而坐誦讀紡績不午夜不止鄰媪夜
夜聞之率以是驗時遲早云比長服
賈上海堅苦卓絕誠信孚於廛市久
之名愈章業愈盛遂起其家君事親



至孝既用滯鬻致羸則思所以紹先
志而慰母心者葺宗祠置祭田修家
乘立族學族之教養無不贍也鄉閭
之興造無不資也交親鄰毗之疾痛
緩急無不援卹也凡有設施輒將母
旨以行家居尤敬事長嫂飲食服御



僅視母為豐殺不使其妻抗顏行曰
吾母之再造厥家嫂與有勞焉若何
人可無差等邪君之惇厚反本終始
不渝蓋如此配同縣葛氏男子子二
雲鵬雲鴻雲澌雲鵬已生子四
人女子子二皆適同縣周氏民國十




九年君年五十有四自營生壙於文
溪屬余記而鐫諸石爰系之辭曰

生也有涯而無涯匪天之靳視所施
惟德不訾名不虧藏焉息焉兆在斯
繇繇歲月君俟之

中華民國十九年八月同縣馮玕撰





152 2006TP
6